

**Meeqqat, inuusuttut inersimasullu akornanni naqinnernik ilisarinnissinnaanngitsut aamma atuarnermik allannermillu ajornartorsiuteqartut pillugit nuna tamakkerlugu iliussissanik pilersaarusiornissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartuni ilaasortaq Sofia Geisler, Inuit Ataqatigiit)

### **Akissuteqaat**

(Ilinniartitaanermut, Kultureqarnermut Ilageeqarnermullu Naalakkersuisoq)

### **Siullermeerneqarnera**

Naalakkersuisut Inatsisartunut ilaasortaq Sofia Geisler, Inuit Ataqatigiinneersoq, aalajangiiffigisassatut siunnersuutaanut qujassuteqarfigaat.

Naalakkersuisut siunnersuuteqartoq isumaqatigaat oqarmat, pitsaasumik atuarsinnaaneq allassinnaanerlu atuarnermut ilinniarnermullu pingaaruteqarluinnartuummata tunngaviulluinnarlutillu. Amigartumik atuarsinnaanerup allassinnaanerullu inuttut inuunermi, atuarfimmi, ilinniagaqarnermi suliffeqarnermilu pitsaasumik ingerlatsisinnaaneq ajornakusoortilersinnaasarpaat. Taamaattumik pineqartoq tamanna naammassisassanik suliniuteqarfiuvoq pingaaruteqartoq Naalakkersuisunillu eqqumaffigineqarsimasoq sulii ukkatariniarneqartoq.

Meeqqat, inuusuttut inersimasullu akornanni naqinnernik ilisarinnissinnaannginnermik, atuarnermik allassinnaanermillu ajornartorsiuteqarneq pillugu nuna tamakkerlugu iliussissatut pilersaarut UKA2011/131-p akuerineqarneratigut aallartinneqarpoq. Naak nuna tamakkerlugu iliussissatut pilersaarut 2014-imi qinersisoqarnera pissutigalugu unitsinneqaraluartoq, periusissamik suliaqarnermi naammassisassanik suliaqarneq arlalitsigut ingerlateqqinneqarpoq. Meeqqanut, inuusuttunut inersimasunullu atuarnermik, allannermik aamma naqinnernik ilisarinnissinnaannginnermik ajornartorsiuteqartunut suliniutit naammassiniakkat ingerlanneqarput. Suliniutit naammassiniakkat meeqqat atuarfiannut, Majoriamut, GUX-S-imut højskolimilu atuartunut tunngatitaapput. Suliniutit qulaani taaneqartut qanoq ingerlaneri Naalakkersuisunit malinnaaffigeqqissaarneqarput.

Suliniutit taakkua naammassiniakkat ilagivaat 1. - 3. klassini misiliutinik ineriartortitsineq. Misiliutit taakkua atuartunik naqinnernik ilisarinnissinnaannginnermik ajornartorsiuteqalersinnaasunik naammattuuniarnermi ikiuutaasinnaapput, suliniullu taanna Ilinniartitaanermut Aqutsisoqarfimmi dysleksi (naqinnernik ilisarinnissinnaannginneq) pillugu suliniuteqarnerup annertunerusup ilagivaa. Misiliutit atuartitsinissamullu siunnersuutit tassunga tunngasut 2020-p naanerani saqqummiunneqassapput. Taassuma saniatigut naqinnernik ilisarsisinnaanngitsutut ilimanaateqarsinnaasut siusissukkut nassaarisarnissaat pillugu nalunaarussiaq saqqummersinneqaqqammerpoq tassani 1. klassimiit 3. klassimut atuartut sivisuumik misissugarineqarsimaneri allaaserineqarlutik. Nalunaarusiami meeqqat

atuarfianni akullerni atuartunut iliuuserineqarsinnaasunik arlariinnik aamma inassuteqaateqartoqarpoq. Taassuma saniatigut Kalaallit Nunaanni atuarnep ineriartornera pillugu nalunaarusiamut malitseqartitsilluni misissuinissat nalunaarusiami innersuussutigineqarput.

2021-p aallartisimalernerani Ilinniartitaanermut Aqutsisoqarfiup meeqqat atuarniarnikkut allanniarnikkullu siusissukkut ineriartornerinik tapersersuutaasussamik sulii atualinngitsunut meeqqallu atuarfianni atuartunut atugassamik ilinniummik digitaliusumik saqqummersitsissamaarpoq.

Atuarnermik allannermillu sanngiiffeqartunut naqinnernillu ilisarinnissinnaanngitsunut suliniutit naammassisakkat tamarmik uppersarparaat, ilinniartitaanerup iluani suliffeqarfiit susassaarfiillu assigiinngitsut pingaaruteqartumik tamatuminnga eqqumaffigisaqarluarnissartik aallukkaat.

Naalackersuisut isumaqarput ajornartorsiuteqarfiusunut annertuunut pingaaruteqartunullu taakkununga naammassisassanik suliniutinik suliniutinillu allanik aallartitsisoqarnissaa pitsaasuusooq. Suliniutit naammassisassat amerlasuujupput assigiinngiqalutillu, taamatullu ilisimasat misilittakkallu annertuut katersorneqarput, nuna tamakkerlugu iliuusissatut pilersaarummik suliaqarnermi ilanngutissallugit pingaaruteqartut.

Iliuusissatut pilersaarummi siunnersuutigineqartumi sullinniakkat amerlasuujupput, tassaallutik meeqqat, inuusuttut inersimasullu. Tamanna pissutigalugu nuna tamakkerlugu iliuusissatut pilersaarutip Ilinniartitaanermut Aqutsisoqarfiup aamma Suliffeqarnermut Naalackersuisoqarfiup, Majoriamik ingerlatsisuusup, akornanni suleqatigiissutaanissaa pitsaaqutitaqassaaq. Taassuma saniatigut meeqqat, inuusuttut inersimasullu akornanni naqinnernik ilisarinnissinnaannginneq aamma atuarnermik allannermillu ajornartorsiuteqarneq pitsaaliorniarlugit nuna tamakkerlugu iliuusissatut pilersaarut Suliffeqarnermut Naalackersuisoqarfiup periusissiaani neqeroorummut "Assaat tamarmik sulissapput"-mut atassuserluarneqarsinnaavoq, tassani inuusuttut atuagarsornermik sanngiiffeqartut ilinniagaqarnissaannut periarfissat siuarsarneqartussaammata.

Naalackersuisut taamatut oqaaseqarlutik siunnersuutip akuerineqarnissaa inassutigaa.